

永平府志
(光緒)

一一

永平府志卷五十八

列傳十 仕蹟三

國朝

管聲揚字鳴鑾號鳳岡盧龍人明崇正己卯舉人

國初任常州水利通判操守清廉職務勤慎釐正鹽法
清理糧務築堤濬塘水利大興丁內艱服闋三院交
章題薦以疾辭子鞏祚邑庠生謹厚尙義孫三伯季
俱庠生仲名標康熙丙子舉人

呂鳴章字大呂山海世胄性孝友嘗遵父母命讓爵與
產於弟以官廕予姪又爲亡姪立嗣明天啟元年恩

貢初任許州州判當事重其才任以撫寇深入賊巢能不辱命比旋寇叛躬率家丁巷戰力保危城尋遷京衛經歷以內艱歸甲申革命佐義旅大戰石河努
力殲寇錄功補戶曹員外郎歷陝西分守關西道右
參議致政歸家居二十年問耕課讀清素自甘子爆
如由貢生歷黃陂宰

郭仲金字鞏圖山海衛人明末諸生居角山下之桃花
園耕讀並勵試優等食餼於庠待異母弟友愛備至
深得繼母歡順治初由貢生任良鄉教諭教士用安
定學規士風大振擢平陰知縣政尙簡要法行而民

不擾時當

國初新造地方徵調實繁而支應無誤自奉甚約署中無眷屬止二僕用度不足則取給於家絕不借用官物大吏悉其廉能薦擢安陸府同知順治七年卒於官八年

覃恩廕一子入監讀書康熙五十四年入祀鄉賢祠

參錄
畿輔

志及郭
氏家乘

趙申寵字恬如灤州人養沖子性孝友有幹濟才孝事繼母兩弟爭宅構訟寵指官曰弟之爭兄之罪也願以寵所市宅讓弟司理表其門曰有伯夷風癸未以

廩生入太學授山東布政司理問甲申逆闖之變寵
視陽信篆僞命至集義勇擒殺之

國朝定鼎後走京師上其狀卽以之實陽信令復擒僞
都司孫邦奇斬之四境遂安旣以轉餉功陞陝西莊
浪衛同知茶馬御史蘇某以前官事誣奏寵革職未
行忽米同作亂寇莊浪強官寵不從逼以刑終不屈
乃幽於別室總督孟援至賊始遁復約其部圖再舉
寵矯總督檄聯絡西番七十二堡以禦之事平總督
首寵功

詔復原官改浙江湖州府同知甫任卽視篆歸安以漕糧

過淮遲期爲漕撫所劾逮至京昭雪復補福建汀州府同知未行以疾卒年七十有三子御衆事具文學傳

高選字輪轂山海衛廩生少有膽略明崇正甲申四月闖賊將東逼山海時議詐降緩賊以待

大清兵選隨生員李友松譚邃寰劉泰臨鄉耆劉臺山黃鎮庵共六人輕身給賊行至三河遇賊遂羈而東及大兵破賊於關城石河之西友松等五人均遇害獨選乘閒歸賊追之身被三矢

國朝錄功授山西交城令城西交山連接秦晉綿延千

里渠魁祁三聚眾抗拒選伏兵擊之搗其巢穴交山

遂平擢知平陽府左遷廣信同知卒康熙五十三年

崇祀鄉賢

參錄畿輔通志及潛滄集

劉克望永平人貢生順治元年知馬邑縣事當定鼎之

初留心民瘼以樸實率下不事煩苛邑人感之

朔平府志

馮祥聘山海衛人順治初年以廩生任齊河令時流賊

逼城祥聘捍禦有方城得保全論功陞湖廣長沙府

同知尋知府事

山東通志

董應魁字捷軒遷安人生於明萬厯中喜讀書慷慨有

大節當

太祖天聰二年

詔入國學教授勳戚子弟一時賢俊多出其門迨順治建
元授直隸良鄉縣令良爲京畿首邑車馬孔道兵戈
之餘民席未煖魁竭力撫字抑驕弁甦郵困採屯地
公明任事人以強項令稱之尋擢湖南寶慶府知府
去之日良民攀留爲之罷市巡按高公因奏請留任
旨不可乃南行是時寶慶尙未入版圖隨軍贊畫丁亥仲
秋疆場始闢泣任之時僵尸遍野蒿萊滿署城中蕭
然魁埋胔掩骼招集流亡民始還居未幾城守魏弁
作亂合郡騷然魁單騎詣魏營正色折之亂乃定又

主客兩將失歡夜譁巷戰魁欲往救左右不可魁曰
吾不往民無噍類矣郡牧之謂何至則以片語解之
陞武昌分守道值黃屬寇起嘯聚山砦督兵進勦刻
期蕩平陞山東驛傳鹽法道遷福建按察使先是漳
州道黃澍爲海寇所困食已盡魁設計登樓張樂累
日寇疑解去陞廣西右藩旋晉刑部右侍郎

賜蟒玉給一品服

誥封四代奉

命巡撫廣東適逆賊鄧耀等梗化魁帥兵直搗龍門寨追
至交趾由是而楊江平時粵中入版圖未久士民有

包荒之累魁數題請得蠲免荒逋錢糧二百餘萬歷
官十有七年食不兼味衣不改素歸田後常與少司
農謝路然督餉裴長山開府張英震劉盤所徐吉吾
潘世衡張仙羽憲副劉詔軒諸老遊好事者爲之繪
九老圖康熙二十五年卒年九十入漢軍旗籍其後
世居遷之上午村

宋聚臣灤州人生而奇穎未冠能文科歲試輒冠軍英
年食餼初

世祖入關道策郡國所貢士拔其尤者立授民社聚臣得濟
南之平原勸課有經士民感戴乙酉分校山左秋闈

所得多知名士既解組歸與鄉人處和霽恭謹不挾
勢驕人年七十有三卒

楊文魁號近樓永平衛人

國初以副將從征屢立戰功擢工部左侍郎凡條議時
務精練豁達奉差監修奉天諸

陵寢事勞績懋著

卜昌運字泰寰東勝衛人順治二年貢除南宮訓導東
光縣教諭羣盜猝犯城運率家僮登陴奮呼隸卒礮
擊渠魁城賴以全擢知江都縣卒於官

穆維乾字介公號圭炎山海衛人少嗜學博通經史領

順治乙酉鄉薦爲涇縣教諭遷保定左衛教授整飭學規課士有方嘗攝滿城邑篆值旱荒設法賑濟全活甚眾巡撫金公疏薦云行同濂洛關閩才類韓柳歐蘇眞實錄也陞翰林院典簿時修四書滿漢講義至羔裘元冠不以弔掌院葉公方藹爲犯

聖諱商於同僚俱不能對乾謂大字當仍原字以尊經小註改元字以避諱掌院詢何所本日中庸慎獨乃原字小註改謹字掌院大悟云余自幼疑此今始知朱子爲避諱也深加敬禮預修

太宗文皇帝實錄賜白金文綺及歸休林下講學論道誘迪

後輩殷殷不倦生平廉節自持不慕權勢鄉望特隆
康熙五十三年卒崇祀鄉賢

陳性天樂亭人順治乙酉舉人應省試時於逆旅得遺
金不開緘閱九日失金人號泣而來原緘授之後授
宜川令地與米脂接壤闖賊亂後人民凋敝撫字勤
勞六七年閒境內大治去官日邑人建清風閣以志
遺愛康熙五十三年祀鄉賢

畿輔志

石申字仲生灤州人明副使維嶽子登順治丙戌進士
選庶吉士視學江南搜拔孤寒所取士多掄大魁歷
遷學士

經筵擢吏部左侍郎矢公無欲門絕苞苴以抗中忌奪職
後起補刑部左侍郎上慎刑疏天下傳誦丁繼母艱
服闋補戶部左侍郎總督倉場舊例廚饌交際取資
斗級衙僧藉恣吞啗申一切罷去綜核無遺釐清風
弊值慈母訃聞歸里嬰疾而卒

勅賜祭葬祀鄉賢先是

世祖章皇帝稽古制選漢官女備六宮申女及笄承

恩賜居永壽宮冠服用漢式

敕召申妻趙淑人乘肩輿入西華門至右門下輿入

宮行家人禮

賜重筵

賜紵賞賚有加後封恪妃

李成性遷安人登順治丙戌進士任新城令撫綏殘邑
克著循聲未幾乞休歸隱居山莊讀書嗜古耄年弗
倦鄉人推爲理學先型

穆爾謨字賓日山海衛人順治丙戌丁亥聯捷成進士
初知江南贛榆縣精明英毅聽斷如流羽冠猖獗親
率鄉兵勦捕之累官至山東萊州府知府母沒廬墓

三年

舊志爾謨無傳此據江南通志及萊陽宋琬安雅堂集補案宋與爾謨爲鄉會同年其贈詩云

昔君作吏長淮北升堂拜母歡相得石濩湖頭別幾秋寄書竟乏南飛翼去年奉母廣柳車麻衣徒步歸

里間倉皇未得走相唁炙雞欲裹空嗟起近聞馬鬣已就封何以樹之梓與松白石爲垣茅作屋晨昏上食如飡饗素冠樂樂淚瀾瀾涕痕灑處繁英死夜半空山雷電過母也無驚兒在此小人有母早相捐音容髣髴留梧捲生兒未得一日養萬鍾忝竊嗟徒然君不見顏烏之豕高於山羣烏銜土血斑斑又不見東陽許孜攀枝哭猛獸聞之殺麋鹿至性由來動鬼神蓼蓼者莪堪再讀北平郡志遭烽燧忠孝無徵罪長吏今看墓側產芝馴白兔我將大書特書記其事

余一元字占一號潛滄山海衛人明末舉人甲申之變

闖賊東逼總兵吳三桂召一元及紳士等誓師於教場以殺賊復讐激勵將士令一元等登陴固守三桂出偏師殲賊游騎於城西慮賊眾難勝因議請我

大清兵入援令一元暨廩生馮祥聘鄉紳呂鳴夏廩生